

Scéal, Scéal, Scéal...



15 Feabhra 2024 || Eagrán 184

Scéilíní, nuaiócht agus fógraí as Cois Fharraige.

MAIDIN CHAIFE

- Cois Fharraige -

**Bláth Fiáin, An Spidéal
Dé hAoine 1 Márta
11r.n.**

**Caidreamh 's Comhlúadar!
Fáilte roimh chách.**



CLUB SCANNÁN CHOIS FHARRAIGE

Cuirfear tús le gearr-shéasúir scannáin i Seanscoil Sailearna ar an Déardaoin 7 Márta. Ní bheidh ach ceithre scannán á léiriú. Seo a leanas na scannáin atá roghnaithe don gearr-shéasúir.

Ar an 7 Márta, léireofar ‘Anatomy of a Fall’ (An Fhrainc), ar an 21 Márta, beidh ‘Our River, Our Sky’ (An Iaráic) le feiceáil, sula léireofar ‘Past Lives’ (Stáit Aontaithe) ar an 28 Márta agus le críoch a chur leis an séasúr, ar an 4 Aibreán, beidh deis ag bail an chlub an scannán ‘Fallen Leaves’ (An Fhionlainn) a fheiceáil.

Roimhe sin ar an Satharn agus ar an Domhnach 24 agus 25 Feabhra, beidh scannáin de chuid Féile Scannán Bhaile Átha Cliath á léiriú i Seanscoil Sailearna. Is mar chuid de chamchuairt ar dheich n-ionad scannán ar fud na tíre atá na scannáin ag teacht go Club Scannán Sailearna. Seo thíos na scannáin a bhas le feiceáil, mar chuid den chamchuairt: ‘Toni’ (An Fhrainc) ar an Satharn 24 Feabhra. Ar an Domhnach 25 Feabhra, léireofar gearrscannáin na Féile ó thíortha éagsúla ag 12 meánlae, sula léireofar an scannán ‘Mami Wata’ (An Nigéir) @ 2:30i.n. Tá breis eolais ar fáil ón suíomh www.clubscannán.ie agus is féidir ticéid a cheannach ó ‘Ticket Tailor’ ach an nasc ar an suíomh a úsáid.



GAELCHARA

Tá Fóram Chois Fharraige um Pleanáil Teanga sa tóir ar chainteoirí líofa/dúchais, chomh maith le foghlaimeoirí Gaeilge le tabhairt faoin scéim ‘Gaelchara’. Scéim teanga atá inti áit a thagann foghlaimeoir Gaeilge agus meántóir (cainteoir líofa/dúchais) le chéile leis an nGaeilge a chleachtadh agus a úsáid. Moltar go gcasann na rannpháirtithe le chéile thart ar uair in aghaidh na seachtaine agus go ndéantar é seo ar feadh trí mhí nó 30 uair an chloig – cibé chén sprioc a bhaintear amach ar dtús! Iarrtar ar an bhfoghlaimeoir dialann a choinneáil le taifead a bheith acu ar an méid atá foghlamtha le linn na scéime. Tá saoirse iomlán ag na rannpháirtithe maidir le cén chaoi a gcaitear a gcuid ama – téann daoine ar shiúlóidí, le haghaidh cupán tae nó caife nó casann daoine eile ar a chéile le taitneamh a bhaint as caitheamh aimsire comónta atá acu. Caithfidh go bhfuil na rannpháirtithe ag cur futhu i gCois Fharraige, agus ní féidir aon ghaol fola nó pósta a bheith ann idir na rannpháirtithe. Ag deireadh na scéime, bronntar €250, chomh maith le teastas ar na rannpháirtithe. Eagraítear oíche shóisialta do na rannpháirtithe freisin. Tá an scéim á reáchtáil ag an bhFóram Pleanála Teanga le trí bliana anuas le breis ‘s seasca ‘Gaelchairde’ ‘theis páirt a ghlacadh inti go dtí seo! Le níos mó eolais a fháil faoin scéim, nó le clárú di, is féidir teagmháil a dhéanamh le optchoisfharraige@gmail.com Bheadh An Fóram sásta dá mbeadh an pobal sásta an scéal a scaipeadh agus an scéim a mholadh do chainteoirí líofa/dúchais agus foghlaimeoirí Gaeilge ar aon.





GAELCHARA

– CHOIS FHARRAIGE –

Ar mhaith leat feabhas a chur ar do chuid Gaeilge?
Ar mhaith leat cuidiú le duine eile a gcuid Gaeilge a fheabhsú?
Tá tú uainn!!

Tá Fóram um Pleanáil Teanga Chois Fharráige sa tóir ar

(a) **fhoghlaimeoirí Gaeilge**

(b) **chainteoirí líofa Gaeilge**

le bheith páirteach sa scéim **Gaelchara**

Oibreofar in éindí
lena chéile, leis an
nGaeilge a úsáid níos
minicí sa mbaile agus
sa bpobal.

Bronnfar €250 an
duine ar an
fhoghlaimeoir agus
ar an meantóir.

Tá tuilleadh eolais agus an fhoirm iarratais ar fáil ó:
optchoisfharráige@gmail.com nó 083 010 6294

GAELCHARA

– CHOIS FHARRAIGE –



Céard é Gaelchara?

Is scéim forbairt teanga í Gaelchara a thugann deis do fhoghlaimoirí, do dhaoine nua isteach sa gceantar agus cainteoirí líofa cur lena gcuid Gaeilge agus Gaeilge a úsáid níos rialta sa bpobal. Cuirfear meantóir agus foghlaimoir in aithne dá chéile agus oibreofar in éindí le deiseanna a thabhairt don fhoghlaimoir cur lena c(h)uid Gaeilge agus an Ghaeilge a úsáid níos minicí sa saol laethúil sa mbaile, leis na comharsain agus sa bpobal.

Céard í an aidhm?

- Deis a thabhairt do dhaoine atá lonnaithe i gCois Fharráige tógáil ar a bhfuil de Ghaeilge acu.
- Deis a bheith ag daoine atá lonnaithe i gCois Fharráige níos mó Gaeilge a úsáid sa gceantar.
- Tacú le daoine teacht ar dheiseanna le bheith níos gníomhaí sa bpobal.
- Cur le líon na gCainteoirí Laethúla Gaeilge i gCois Fharráige.

Cé atá feiliúnach do Ghaelchara?

- Foghlaimoirí agus cainteoirí líofa Gaeilge a bhfuil cónaí orthu i gCois Fharráige.
- Tabharfar tús áite d'iarratasóirí a bhfuil leibhéal réasúnta Gaeilge acu.
- Níl an scéim feiliúnach do ghlantósaitheoirí an babhta seo.

OÍCHE CHEOIL DO VINCE

Tá oíche cheoil á reáchtáil ar mhaithe le Vince Barker ar an 16 Feabhra @ 7:30i.n. i dTigh Chualáin. Fuair Vince agus a chlann drochscéal le gairid, go bhfuil sé ag fulaingt de dheasca siada inchinne. Táthar ag súil le roinnt airgid a bhailiú ar an oíche ar mhaithe le Vince agus a chlann. Níl gá le ticéad ach fáilteofar roimh dheontais ar an oíche. Beidh Neansaí Ní Choisdealbha i láthair mar bhean an tí, agus beidh ceol den chéad scoth le cloisteáil ó Cheoltóirí Óga Chois Fharraige, Róisín agus Colm Seoighe agus na hÉasógaí, chomh maith le Cogar, Steve Sweeney, Tola Custy agus Laoise Kelly agus Muintir Herson.

CÚRSA BARISTA

Tá cúrsa barista á reáchtáil ag Forbairt Tuaithe na Gaillimhe ar an Máirt 27 Feabhra in Ionad Cuimhneacháin na nImirceach, i gCarna (H91 W60F). Mairfidh an cúrsa ó 9:30r.n.- 4:30i.n. Is féidir níos mó eolais a fháil, nó do spás a chur in áirithe ach teagmháil a dhéanamh le Deirdre ag 087 9695 937 Tá an cúrsa seo á thairiscint saor in aisce.



RANGANNA DAMHSA

Tá ranganna nua ‘Buntreoir don Bhailé’ á reáchtáil i Scoil Sailearna atá dírithe ar leanaí beaga bídeacha. Beidh meascán de ghníomhaíochtaí bailé spraiúla, samhlaíocht, scéalaíocht, damhsa, cluichí simplí agus tasicéalaíocht trí cheol ar chlár na ranganna. Beidh na ranganna feiliúnach do ghasúir idir 3-4 bliana d’aois agus cuirfear tús leis an gcúras ar an 23 Feabhra @ 2:45i.n. Is féidir teagmháil a dhéanamh le: schools@danceconceptseu.com le haghaidh tuilleadh eolais.

LÁ'L PÁDRAIC SA SPIDÉAL

Bhí cruinniú poiblí ag Comhlacht Forbartha an Spidéil le gairid maidir le pleanann a phlé agus a dheimhniú do cheiliúradh na Féile Phádraic sa Spidéal i mbliana. Beidh an chéad chruinniú eile ar siúl ar an Déardaoin 22 Feabhra @ 8:30i.n. In Oifig an Phobail, in aice le gTeic an Spidéil a bheas an cruinniú. Le níos mó eolais a fháil faoin gcruinniú is féidir teagmháil a dhéanamh leis an gComhlacht Forbartha ag anspideal2022@gmail.com

COMHGHAIRDEAS, A MHAIRÉAD!

D'fhógair Ollscoil na hÉireann, Gaillimh, le gairid go bhfuil Mairéad Ní Fhlatharta ainmnithe ag Ionad Léann na hÉireann mar Amhránaí Sean-Nóis Cónaitheach 2024. Is as Baile an tSléibhe í Mairéad agus tá sí ag canadh ó aois 7 mbliana nuair a thosaigh sí ag freastal ar ranganna ag an nGaelacadamh. Deir Mairéad go raibh tionchar thar a bheith láidir ag leithéidí Pat Phádraic Tom Ó Conghaile agus Peatsaí Ó Ceannabháin, nach maireann ar a cuid amhránaíochta. Deir Mairéad go bhfuil an-mheas aici ar amhránaíocht agus ceird de chuid Sheosaimh Uí Éanaí agus Dharach Uí Chatháin agus gur tharraing sí ar ghnéithe éagsúla ó na hamhránaithe sin lena stíl phearsanta féin a bhunú agus a fhorbairt. Luann Mairéad na ceannródaithe Dara Bán agus Caitlín Maude freisin mar fhoinsí inspioráide di i dtaobh cúrsaí sean-nóis. Tabharfaidh Mairéad faoi cheardlanna ag Ollscoil na Gaillimhe ag tosú ar an gCéadaoin 28 Feabhra @ 6i.n. Tá na ceardlanna á thairiscint saor in aisce. Le níos mó eolais a fháil, ní mór teagmháil a dhéanamh le Samantha ag 091 492 051 nó ag samantha.williams@universityofgalway.ie.



CÓISIR 'GAILINTÍN'

Tá cóisir 'gailintín' á reáchtail ag GaelGals i gcomhpháirt le 'Comhscór'. Is podchraoladh é 'Comhscór' maidir le spórt na mban agus spórt na bhfear – téamaí a bpléitear ar comhchéim, trí mheán na Gaeilge. Tá podchraoladh ag na 'GaelGals' chomh maith a bhíonn le cloisteáil go seachtainiúil ar Raidió Rí-Rá. Beidh an chóisir ar siúl i gClub Chonradh na Gaeilge ar an Satharn 17 Feabhra @ 7:30i.n. Beidh podchraoladh á thaifeadadh beo ar an oíche, beidh cluichí agus manglaim speisialta ar fáil ar an oíche. Is féidir ticéad a cheannach ar chuntas Instagram na 'GaelGals' agus is féidir síntiús a thabhairt ar an oíche ar mhaithe le 'Women's Aid'. Chomh maith le sin, tá comórtas á reáchtáil ar chuntas Instagram 'GaelGals' agus 'Comhscór' le ticéid a bhuachan.



CIORCAL COMHRÁ

Cuireadh tús le Ciorcal Comhrá seachtainiúil ag Muintearas le gairid. Tiocfaidh an grúpa le chéile chuile Chéadaoin @ 10r.n. Deis do dhaoine a theacht le cheile atá ann le haghaidh comhrá agus comhlúadar. Díreofar ar chúrsaí ceardaíochta ar nós cniotáil, cróiseáil, ealaíon agus péinteáil ach fáilteofar roimh smaointe eile freisin, ar ndóigh! Le tuilleadh eolais a fháil, is féidir teagmháil a dhéanamh le 085 844 6802



BÁNÚ AG LÉIRSIÚ

Bhí ionadaithe ón eagraíocht BÁNÚ agus ó Chumann Forbartha Chois Fharraige i measc na sluaite a bhí bailithe taobh amuigh de Theach Laighean le gairid, ar léirsiú a bhí eagraithe ag Conradh na Gaeilge. Bhí an léirsiú ag éileamh aitheantais cuí don Phleanáil Teanga sa mBille nua Pleanála, a bhí á phlé ar an lá ag Coiste an Oireachtais. Mar chuid de fheachtas BÁNÚ beidh an clár faisnéis 'Céad Bliain de Thithíocht', á thaispeáint ar an gCéadaoin 21 Feabhra, i spás le Coláiste Lurgan (ar chúl an Chomhar Creidmheasa), ag tosú ag 8i.n. Clár é seo a léiríonn an bealach ar tharla an ghéar chéim tithíochta sa stát agus sa nGaeltacht. Beidh Seosamh Mac Donncha ann mar aoichainteoir ar an oíche agus beidh Gordon Bruic, eagarthóir an chlár i láthair chomh maith. Is féidir ticéad a fháil don imeacht ach cuairt a thabhairt ar Eventbrite faoin dteideal: Scannán agus Plé 100 Bliain de Thithíocht Géarchéim gan Deireadh



FOLÚNTAIS AG COMHARCHUMANN SAILEARNA

Tá folúntais fógartha le gairid ag Comharchumann Sailearna. Tá Bainisteoir Tograí lán-aimseartha á lorg chomh maith le Riarthóir páirt-aimseartha. Tá Feighlí Ionaid lán-aimseartha á lorg chomh maith le hOibrí Cistine lán-aimseartha. Tá gach eolais le fáil ach teagmháil a dhéanamh leis an gComharchumann ar 091 399199, nó is féidir teachtaireacht ríomhphoist a sheoladh chuig sailearna@gmail.com

CUMANN CAMÓGAÍOCHTA CHOIS FHARRAIGE

Tá Cumann Camógaíochta Chois Fharraige ag réiteach don chéad séasúr eile. Chuige sin beidh dianchúrsa Scileanna Camógaíochta ag tosú ar an Domhnach 25 Feabhra, ar An Spidéal, do chailíní agus mná ó Chois Fharraige (12 bhliain d'aois +). Beidh ocht seisiún ar siúl thar cheithre seachtaine. Is deis é seo do mhná/chailíní ar mhaith leo filleadh ar an gcamógaíocht, nó d'imreoirí ar mhaith leo scileanna a fheabhsú. Beidh costas €30 ar an gcúrsa. Is féidir tuilleadh eolais a fháil, nó clárú don chúrsa, ach teagmháil a dhéanamh le Páid ag 087 3012510, nó le Martina ag 087 6372941. Cuirfear tús go luath le traenáil faoi dhíon d'imreoirí an chumainn agus beidh fáilte roimh imreoirí nua, ó sé bliana d'aois agus níos sine, clárú leis an gCumann Camógaíochta. Is féidir clárú ar líne freisin ag www.foireann.ie. Is féidir ríomhphost a sheoladh chuig coisfharraige21@gmail.com le tuilleadh eolais a fháil.

CLG MICHEÁL BREATHNACH

Tá CLG Micheál Breathnach ag glacadh le baill nua, d'fhoirne faoi aois, faoi láthair. Le himreoir faoi aois a chlárú, chaithfí sonraí thuismitheora/chaomhnóra amháin, ar a laghad, a chlárú chomh maith. Seo a leanas na teagmhálaithe faoi aois atá ag an gcumann don bhliain 2024. Don pheil, is féidir teagmháil a dhéanamh le Paul Ó Neachtain ag peilnanogmb@gmail.com. Do chúrsaí iománaíochta, is féidir labhairt le Caroline Uí Chadhain ag iomaintnanog@gmail.com, nó sí Bridie Uí Chionnaith cláraitheoir an club, ar fáil ag clarumb1@gmail.com. Iarrtar go mbeadh baill nua cláraithe roimh 31 Márta i mbliana.